

春
秋
直
解

春秋直解卷之七

余熒

門人程 崑校讐

桐城方 苞著

劉 敦

次男道興編錄

宣公

元年春王正月公卽位

穀梁傳繼故而言卽位與聞乎故也。宣公篡

立與桓公同而月皆繫王何也義見於前則餘
仍其常可也

公子遂如齊逆女

在喪而婚懼討而急自結於齊也桓之立翬爲
逆女焉宣之立遂爲逆女焉則其爲先君之賊
時君之謀主可知矣納幣不書豈公薨之後約
婚以爲篡弑之地而納幣在子卒之前故不得
書於冊與

二月遂以夫人婦姜至自齊

六禮不備則女不行近世未嫁守貞而父母不能奪者多矣不稱氏夫人與有貶也稱婦賁敬羸也

夏季孫行父如齊

左傳納賂以請會

晉放其大夫胥甲父于衛

殺三大夫稱人盾主之也放胥甲稱國非盾主之也據傳討軍門之呼則趙穿實爲罪首八年不討盾庇之耳疑靈公陰謀除盾欲翦其羽翼

命治舊獄。意本在穿而盾專國政。乃釋穿而放甲。故公之惡盾益深。而穿之謀亂益急。明年遂有桃園之弑也。

公會齊侯于平州

胡傳案左氏曰。會於平州。以定公位。春秋以來。弑君篡國者。已列於諸侯之會。則不討也。欲定其位者。魯宣宜稱及齊。而曰會者。討賊之法也。凡討亂臣賊子。必深絕其黨。

子遂如齊

六月齊人取濟西田

穀梁傳內不言取言取授之也。以是爲賂齊也。蓋內地被侵奪。舊史常諱而不書。惟濟西謹闡魯以授齊得書於冊。知然者以經所書歸田其始失皆不見也。觀濟西田之取而子弑夫人大歸得免於討之故可知矣。二卿之聘婦姜之歸平州之會皆以貪而動於惡可知矣。不書魯賂而書齊取。著齊侯之罪也。魯君臣負篡弑之惡。於致賂何誅焉。○張氏洽曰桓公篡立求援於

鄭而誘以許田宣公奪嫡主齊以自立而賂以濟田以利自固前後一轍使鄭莊齊惠不貪其利則桓宣必不能以自立矣

秋邾子來朝

楚子鄭人侵陳遂侵宋

鄭稱人君不行也是役也雖左傳亦無鄭伯在師之文而胡傳必以爲貶過矣晉襲文襄霸業而會盟討伐君皆不出使大夫專行楚則銳意中國凡有大役君必親之據事直書而盛衰之

本見矣。

晉趙盾帥師救陳

盾自九年以後凡侵伐皆使諸卿今復自出蓋弑謀益急欲示威於衆而假公義以服諸侯也。宋公陳侯衛侯曹伯會晉師于棐林伐鄭

胡傳地而後伐于袤則疑辭此則著其美非也其事果善豈待書會地而後美著耶蓋伐國有成謀而連兵以往則直書會伐中道而定謀焉則先書會地袤與棐林無異義也。晉師本出救

陳會於棐林而後伐鄭之謀定焉。安得不先書會地哉。其不曰會晉趙盾何也。書會晉師則專會伐也。書會趙盾則似盾與諸侯先行會禮而後伐矣。

冬晉趙穿帥師侵崇

胡傳晉欲求成於秦而伐其與國意者趙穿已有逆心欲得兵權託於伐國以用其衆乎不然何謀之迂也

晉人宋人伐鄭

胡傳貶而稱人非也。自文以後，霸國之卿獨伐以名見。與列國會伐，仍稱人。自宣以後，卿將以名見。而大夫將則稱人。皆舊史之文。因時勢以爲詳畧者也。盾方內憂，志不在諸侯。實將罕師少耳。左傳紀戰伐於軍帥，十得八九。而是役亦曰晉人，則微者可知矣。秋救陳伐鄭，盾方在行。冬穿又帥師侵崇，豈能爲宋？復勤大師遣貴將乎？

二年春王二月壬子，宋華元帥師及鄭公子歸生

三才圖會 卷之十 五
帥師戰于大棘。宋師敗績。獲宋華元。

自是列國卿將皆書帥師而以名見矣。其稱人者非卿也。以宋及鄭以尊及卑也。君獲不書師敗績舉重也。卽君將不書帥師之義。卿獲書帥敗績其重均也。

秦師伐晉

秦舉大師必貴將也。而不以名見何也。秦遠於魯而隔於晉。魯人視之終不同於列國也。故列國之卿無不氏。而秦術以國舉。列國卿將無不

名而秦終稱師與人也。

夏晉人宋人衛人陳人侵鄭

諸國皆非卿也。盾蓋謀弑益急無心於外事矣。
秋九月乙丑晉趙盾弑其君夷臯

胡傳趙穿手弑其君董狐歸獄於盾曰子爲正卿亡不越境反不討賊非子而誰亡而越境謂去國而不還也。然後君臣之義絕反而討賊謂復讐而不釋也。然後臣子之事終不然是盾僞出而實聞乎故也。假令不與聞而縱賊不討是

有今將之心而意欲穿之成乎弑矣以高貴鄉公之事觀焉抽戈者成濟唱謀者賈充而當國者則司馬昭也爲天吏者將原司馬昭之心而誅之乎亦將致辟成濟而足也然則盾爲首惡明矣。呂氏祖謙曰盾平日所與親厚者惟穿耳故敢行弑君之逆盾歸旣不討其弑君之罪反使穿逆公孫黑臀於周而立之則盾之情無所逃矣。邵氏寶曰春秋之筆莫大於斷弑君之獄斷弑君之獄尤莫大於微顯閭幽之二三

策者是故晉夷臯之弑舍穿而歸盾鄭夷之弑舍宋而歸歸生楚虔之弑舍觀從而歸比齊荼之弑舍朱毛而歸乞

此董子所云視人所惑大爲說以明之也

冬十月乙亥天王崩

三年春王正月郊牛之口傷改卜牛牛死乃不郊猶三望

公羊傳其言之何緩也曷爲不復卜養牲養二卜帝牲不吉則拔稷牲而卜之帝牲在於滌三月於稷者惟具是視郊則曷爲必祭稷王者必

以其祖配王者則曷爲必以其祖配自內出者無匹不行自外至者無主不止。穀梁傳之曰緩辭也傷自牛作也。胡傳乃不郊爲牛死也不然郊矣禮爲天王服斬衰周人告喪史策已書而未葬也祀帝於郊夫豈其時而或謂不以王事廢天事禮乎

葬匡王

呂氏大圭曰或謂桓王匡王之葬皆公親往然葬諸侯而使卿則書其人其他不書其人者皆

謂公親往可乎

楚子伐陸渾之戎

陸渾逼近王城楚莊親伐間晉有內難而窺周也觀兵問鼎而以爵舉則稱爵爲褒之說不可通明矣

夏楚人侵鄭

自成七年書嬰齊帥師以前稱楚人者卿大夫也其後稱人稱師者將非卿也猶自文以前列國稱人稱師者卿大夫也自宣以後稱人稱師

者將非卿也

秋赤狄侵齊

宋師圍曹

狄侵齊宋圍曹知晉方內憂未遑外事

冬十月丙戌鄭伯蘭卒

葬鄭穆公

四年春王正月公及齊侯平莒及邾莒人不肯公

伐莒取向

汪氏克寬曰及齊公之志也及邾以大及小也

○向微國也。隱二年莒人入向。至是遂爲莒邑。而其滅不見於經。故知春秋之初滅國者多不告也。

秦伯稻卒

夏六月乙酉鄭公子歸生弑其君夷

以傳考之歸生懼譖而弑成蓋釁起於公子宋而弑者歸生也。宋之譖得行於君則嘗鼂之憾已釋而歸生懼譖則與君相構之隙轉萌於歸生。故知弑者歸生也。十年傳鄭人討幽公之亂。

斲歸生之棺而逐其族則知宋爲巧構之謀而
弑則歸生主之矣。釁起於宋謀構於宋而使得
逃於亂賊之名何也。春秋書王法不誅其人身
僉險小人陰賊好禍者無國無之。目其人不足
以垂戒。故惟秉國者是誅。趙盾用晉則操刃者
穿而不書。歸生用鄭則構亂者宋而不書。歸生
無弑謀則宋之亂不成。盾無弑心則夷臯之賊
可討。此聖人所以決疑制法也。春秋時有以強
臣怙亂而弑君者。華督之類是也。有小人乘間

竊發而弑君者宋萬聞職郈歆之類是也使宋有督之勢則其弑不謀於歸生有萬之力職歆之謀則歸生不許可自爲賊而無事反譖歸生於公宋不能自作難而謀於歸生歸生不許轉構歸生於其君而不能獨發則夷之弑非歸生孰爲之哉先儒以爲舍宋而歸獄焉猶未得其實也

赤狄侵齊

秋公如齊公至自齊

冬楚子伐鄭

趙盾弑君無辭以討鄭亂故楚人乘此以圖霸也

五年春公如齊

左傳高固使齊侯止公請叔姬焉

夏公至自齊

秋九月齊高固來逆子叔姬

何以書公爲之主也且徵叔姬三月而遽歸也
孔氏穎達謂高固亦請於君因聘而逆非也果

爾則宜以聘書而不言逆矣

叔孫得臣卒

冬齊高固及子叔姬來

何以書三月而歸寧且與高固偕也國卿連以私事出疆齊之無政亦可見矣

楚人伐鄭

六年春晉趙盾衛孫免侵陳

公羊傳以盾復見經證其非弑非也內之賊如翬如途外之賊如楚商臣蔡般名之見經屢矣

春秋之法未嘗有是也。盾旣弑君，故不敢以兵柄授人，身負大惡而以討人，宜陳之不能服矣。

夏四月

秋八月螽

冬十月

七年春，衛侯使孫良夫來盟。

左傳：始通且謀會晉也。穀梁傳：來盟，前定也。不言及者，以國與之。不言其人，亦以國與之。來盟不日，以君使爲文，不得冠以日也。聘而盟。

則日君使之聘而未使之盟也

夏公會齊侯伐萊

曰會齊爲主也

秋公至自伐萊

大旱

冬公會晉侯宋公衛侯鄭伯曹伯于黑壤

左傳魯不與盟而諱之非也經書公之列會而未書諸侯之盟則諸侯實未嘗盟耳

八年春公至自會

夏六月公子遂如齊至黃乃復

左傳有疾而經不書何也。昭公如晉書有疾至河乃復。君如鄰國得自專也。大夫朝聘而終以尸將事。可以疾廢乎。使書有疾乃復。則習其讀者。以爲有可復之義矣。乃者無其上之辭。

遂已有事于太廟。仲遂卒于垂壬午。猶繹萬入去籥。

有事時祭也不舉祭名。譏不在祭也。曷爲稱仲遂生而賜氏。俾世其卿也。繹者祭之明日以賓。

尸也萬舞也以其無聲故入而用之箛管也以其有聲故去而不作猶者可已之辭記稱卿卒不釋以春秋所書知之也。鞏不書卒而遂書卒先儒以爲記禮之變非也春秋非記禮之書也魯之變禮可盡記乎卒不當書則并其變禮之迹而沒之可也蓋特文以見義而後乃仍其故常者春秋之法也春秋存王法不誅其人身故桓之篇非獨鞏不書卒凡隱之大夫而臣於桓桓之大夫而死於莊之世者皆不書卒也蓋月

不繫王以示天王之當誅亂大夫不書卒以示
臣子之當討賊此義既見則後此不得不仍其
故常矣。天王所當誅之亂不獨魯也。篡弑接迹
使皆以月不繫王見義則二百四十年月不繫
王者幾半。樊然殺亂而習其讀者幾不知其義
之在矣。月不繫王之例既不可通則大夫不書
卒之例亦不可用矣。且彭生不書卒使宣之篇
大夫皆不書卒是使彭生與亂賊同罪而無以
辨也。獨削遂之卒則既與彭生之不書卒相混。

又似桓之大夫皆與翬同心而得臣行父得以
隱其惡矣。然則仲遂書卒乃春秋常法非以紀
禮之變也。

戊子夫人嬴氏薨

前書夫人姜氏歸於齊此書夫人嬴氏薨則逐
文君而僭其位。其迹顯然矣。何以知姜氏之爲
嫡娶見於經也。

晉師白狄伐秦

穀之役書及姜戎晉志也。此不書及同惡也。左

傳白狄及君同州君之仇讐則伐秦之師各逞其忿而非晉所專可知矣

楚人滅舒蓼

秋七月甲子日有食之既

冬十月己丑葬我小君敬嬴雨不克葬庚寅日中而克葬

公羊傳而者何難也乃者何難也曷爲或言而或言乃乃難乎而也。馮荆南曰書日中而克葬譏亟也若葬無譏則書庚寅而克葬可也蓋

葬必以朝故記曰反日中而虞左傳鄭簡公之
葬也司墓之室有當道者毀之則朝而塋不毀
則日中而塋則葬宜以朝明矣附於棺者必誠
必信既以雨止而至庚寅何不可更易一夕之
期而必以日中亟葬哉又記稱匱引至於垣遇
日食止於道左以待明復則遭事之變葬可以
易期審矣

城平陽

楚師伐陳

九年春王正月公如齊公至自齊

胡傳謂公如齊仲孫蔑如京師故特書春王正月以表之與上五年下十年如齊有異非也上五年往反歷一時也下十年往反盡一時也此年往反在一月也往反歷二時而中無間事以時舉可矣不必著其月也往反盡一時中無間事以時舉可矣不必著其月也往反在一月安得以時舉哉汪氏克寬謂僖襄二公如齊晉其時王室無嘉好喪葬之事則書王正月乃常例

與公如齊而仲孫蔑如京師。天王崩而公在楚，異亦非也。公如齊而仲孫蔑如京師，不書王正月，其罪遂可掩乎？天王崩而公在楚，不書王正月，遂不知其僨已甚乎？或舉時，或舉月，所以稽久暫，見事實，皆舊史之文耳。僖十年十五年如齊，襄二十一年如齊，皆書王正月者，後有異事，不得不舉首月也。襄八年春如齊，無異事而舉首月者，是年夏季孫會邢邱後公方歸，故書正月以志去國踰時之久。皆舊史因事屬辭，不得

不然如孔子用此爲褒貶設舊史不書正月可臆度而增益之乎

夏仲孫蔑如京師

齊侯伐萊

秋取根牟

八月滕子卒

九月晉侯宋公衛侯鄭伯曹伯會于扈晉荀林父帥師伐陳

諸侯會扈而晉卿伐陳蓋是時晉侯已疾也傳

謂林父以諸侯之師伐陳恐不然牡邱之役書諸侯之大夫帥師救徐則此爲晉師獨伐可知矣。

辛酉晉侯黑臀卒于扈

卒以地在其封內也不書卒於會會已畢也不書葬時魯事齊與晉絕不會也

冬十月癸酉衛侯鄭卒

宋人圍滕

楚子伐鄭晉卻缺帥師救鄭

楚頻年加兵於鄭。胡傳皆以書爵與人爲褒貶。至此義不可通。又謂舉爵或爲褒或爲書其實皆非也。楚自嬰齊帥師以前。君將稱君。大夫將或稱人或稱師。其常也以稱人爲貶。春秋無是法也。篡弑之君會盟侵伐無不書爵。乃以微罪貶而稱人以亂名實乎。且胡傳謂三年無故侵鄭爲不義。貶而稱人則此年伐鄭元年侵陳宋皆無名不義之師而稱爵何也。謂四年鄭有弑君之賊諸侯不討而楚師至故稱爵而鄭賊固

未嘗討也。謂五年伐鄭。稱人爲其興師動衆。賊則不討。惟服鄭之爲事。則四年之師。固以服鄭爲事。而不討賊。胡至五年而後貶哉。謂此年書爵。非予之見。其以重兵臨鄭。果爾。則書楚師伐鄭。亦可以著其重兵之實。何必迂其義而書爵。以混於予之文哉。蓋立義未審。故其說自相糾縛而不能安也。

陳殺其大夫洩冶

胡傳殺諫臣者。必有亡國弑君之禍。故洩冶無

罪而書名爲徵舒弑君。楚子滅陳之端以垂後戒。非也。凡書殺大夫而不著其名者。乃舊史失之。舊史書名。孔子無削之之義也。洩冶之諫不著於經。雖書名。何以見陳侯之殺諫臣而垂後戒哉。春秋書國殺大夫。義在專殺。而非以定所殺者之功罪。如里克甯喜。其罪著於前。如洩冶。其徵著於後。亦事之偶然耳。其他功罪無徵於前後者多矣。所謂存王法。不誅其人身也。乃或削其名。或書其名。而爲此曲義乎。至謂洩冶書

名在子哀叔盼之後益誤矣叔氏也盼名也子
哀亦名也春秋無書字之法。黃氏仲炎曰左
傳載孔子曰詩云民之多辟無自立辟其洩冶
之謂乎此非孔子之言也昔者紂爲不道微子
去之箕子爲之奴比干諫而死孔子曰殷有三
仁焉以比干爲仁則必不以洩冶爲非矣邦無
道危行言孫此世之明哲見幾不仕而高尚者
之爲也若夫有位於朝食君之祿則旣以身許
國矣豈可緘默苟容與俗俱靡以自立辟爲戒

以善保身爲得哉此非所以爲人臣之訓也

十年春公如齊公至自齊

齊人歸我濟西田

馮○荆○南○曰○歸○田○獨○此○書○我○者○濟○西○之○田○齊○與○諸○
侯○皆○有○之○而○所○歸○獨○我○故○封○也○若○鄆○謹○闡○則○魯○
邑○也○龜○陰○之○田○獨○魯○有○也○而○書○我○則○贅○矣○曹○田○
之○在○濟○西○者○魯○嘗○介○晉○以○取○之○矣○豈○元○年○并○以○
賂○齊○而○茲○所○歸○者○獨○吾○故○封○與○

夏四月丙辰日有食之

已巳齊侯元卒

齊崔氏出奔衛

穀梁傳氏者舉族而出之辭也。尹氏崔氏舊史不書名故仍之。家氏鉉翁曰是歲至杼弑君蓋五十二年使杼得年七十此時方在弱冠不應權勢已盛爲人所畏疑非杼之身或其父但不可考爾

公如齊五月公至自齊

癸巳陳夏徵舒弑其君平國

胡傳謂特書徵舒之名氏以見洩治忠言之驗
靈公見弑之由非也。凡弑君稱人者其國本未
得其主名也。華督宋萬歸生趙盾以名氏見者
多矣。何獨於徵舒而生此曲義乎。若謂君無道
當稱人以弑則宋昭齊懿之無道豈更出齊襄
楚靈之上也。

六月宋師伐滕

公孫歸父如齊葬齊惠公

晉人宋人衛人曹人伐鄭

胡傳謂諸侯親行非也左傳稱諸侯之師而未見帥師者之名氏則諸國皆非卿也

秋天王使王季子來聘

書王季子未有職司也或曰時王之子猶時君之女稱子以別之也。胡傳公羊傳曰王季子者王之母弟也王有時聘以結諸侯之好禮也宣公享國至是十年不朝於周而比年朝齊不奔王喪而奔齊侯喪不遣貴卿會匡王葬而使歸父會齊侯之葬縱未舉法勿聘焉猶可也而

使王季子來王靈益不震矣

公孫歸父帥師伐邾取繹

大水

季孫行父如齊

冬公孫歸父如齊

齊侯使國佐來聘

饑

楚子伐鄭

十有一年春王正月

夏楚子陳侯鄭伯盟于辰陵

楚君之書爵舊矣陳鄭之屈服於楚亦舊矣胡傳以書爵而序陳鄭之上謂因其能謀陳而進之陳氏傳良注氏克寬謂予楚以霸非也傳稱侵鄭及櫟未嘗一語及陳事蓋因鄭服并徵會於陳而爲此盟春秋據事直書無以見其爲謀討也縣陳之後聞申叔時之諫乃曰吾未之聞也則前此本無討亂之心可知矣左傳楚子入陳陳侯方在晉使辰陵之盟已定謀討賊豈復

遠如晉乎。旣盟之後，逾三時而後興師。蓋借夏氏爲兵端，實則伺其君之出而謀并其國耳。誠有討賊之心，則陳君在會，以楚之威，執徵舒而戮之，一使者之任耳。豈必以重兵親造其地而後罪人可得乎。

公孫歸父會齊人伐莒

秋晉侯會狄于欒

楚方有事中原而齊晉魯宋各營其私其後四國皆仍世困屈於楚人無遠慮必有近憂信哉

冬十月楚人殺陳夏徵舒

稱國以殺則徵舒陳人非以楚之國法殺之也。目楚子則疑於楚子之私矣。故必稱人而後於義爲安也。

丁亥楚子入陳

殺夏徵舒書人衆心之公也。入陳書楚子一人之私也。徵舒旣殺則陳可不入以明楚子之志在入陳也。胡傳謂不書取陳爲美其討賊之義末減而書入非也。楚實未嘗取陳紀其實耳。

李紱曰。造其國都曰入。株林野鄙去國都甚遠。徵舒弑君。豈敢復入國都。楚子蓋就其私邑。執而殺之。然後入陳耳。經書丁亥在殺徵舒之後。正明殺而後入。傳謂入而後殺。誤矣。

納公孫寧儀行父于陳

國君世子國其所自有也。乃迫於強臣逆子而不得入其書。納順辭也。大夫去國則義已絕。而假外援以抗君父。其書納逆辭也。公子書納著其乘亂爭國之迹也。而先儒皆以內不受爲義。

誤矣。殺洩治者寧與行父激徵舒之弑亦由之。楚子不誅而反納焉。蓋二人本以陳餌楚。故任爲腹心。納之以制陳。而陳自是不敢背楚而從晉矣。

十有二年春葬陳靈公

陳靈公弑於十年夏而十二年春始葬必陳君臣尚不忘討賊而緩其事也。豈知非徵舒執國而不得葬乎。陳旣立君而葬先君必無以禁也。故原臣子之心示賊旣討之義而書葬焉。

楚子圍鄭

胡傳謂楚既入鄭而止書圍爲從輕典非也傳之傳聞與經異耳

夏六月乙卯晉荀林父帥師及楚子戰于邲晉師敗績

救鄭不書不及事也以晉荀林父及楚子以內及外也

秋七月

冬十有二月戊寅楚子滅蕭

觀蕭之滅則知楚得陳鄭而不有乃慮其國大
民未易服而非能止於禮義矣傳言蕭潰而經
書滅傳聞異也胡傳謂經書滅以斷其罪過矣
圍入潰滅事之實也變易事實以爲褒貶則非
傳信之書矣其後宋之亂臣辰佗彊地入於蕭
以叛則楚雖滅之而不能有其地猶屬宋也
晉人宋人衛人曹人同盟于清丘

新城之後扈之盟不書同晉霸猶未衰也自晉
敗於邲楚勢益張諸侯疑懼晉人主盟載書無

不言同者矣。四國稱人先儒以爲貶非也。自成
十五年會鍾離以前大夫之衆會皆稱人。間有
以名見者。霸國之大夫也。然必在會有諸侯而
後霸國之大夫以名見。

宋師伐陳衛人救陳

左傳宋爲盟故伐陳。家氏鉉翁曰。胡氏以宋
爲非義。陳爲可恤。非也。楚用詐人陳。幾亡人國。
春秋不與也。宋伐楚之與國爲人所難。謂之非
義不可。衛甯受清邱之盟。乃救陳以媚楚。謂其

救爲義亦不可。

十有三年春齊師伐莒

夏楚子伐宋

李氏廉曰楚有事於中國皆曰鄭及宋楚成之爭霸敗宋於泓楚穆之爭霸弱宋於厥貉楚莊之興挾鄭人以侵宋今年之伐明年之圍又明年之平而南北之勢成矣。成十八年彭城之役楚又挾鄭以圍宋向非悼公之盛則於宋之盟不待襄公之末年而天下分霸矣。

秋螽

冬晉殺其大夫先穀

先儒於殺大夫每以不去其官爲義非也殺大夫非討賊之比也其居位而見殺者皆書大夫不計罪之有無也鄭良霄晉欒盈旣奔而復入則非其大夫矣惟夏徵舒不稱大夫示討賊之義里克甯喜稱大夫示討之不以其罪則春秋之法寓焉耳。先穀以剛愎致敗然其意本欲振國恥不宜反召狄師恐穀方負罪而狄師適

至晉人以此疑之如鄢陵之役謂郤至召楚師之類耳

十有四年春衛殺其大夫孔達

夏五月壬申曹伯壽卒

晉侯伐鄭

秋九月楚子圍宋

宋不量力而加兵於陳固非謀國之善然楚人力爭中夏鄭服則次及於宋雖無瑕釁亦不免於受兵胡傳謂春秋端本責宋爲深非也傳稱

楚聘齊晉而不假道於鄭。宋儼然行。王使過賓之禮。所以嘗鄭。宋竦齊晉也。宋人毅然殺其使者。實足以伸大義而抑其邪心。春秋何故反深責之乎。若專以利害爲褒貶。恐非聖人意也。○
春秋時。惟宋人有志抗楚。執義不屈。有商人駿肅之遺。

葬曹文公

冬。公孫歸父會齊侯于穀。

十有五年春。公孫歸父會楚子于宋。

宋衛迫楚禍猶以從楚爲恥魯每事先以附之
直書而義自見矣

夏五月宋人及楚人平

外平不書此何以書宋以大義受兵被圍三時
環視不救使力屈而受盟於楚故特書以著霸
主及諸侯之罪也其不書宋及楚平何也見二
國久困於攻守不得蘇息不獨宋人迫欲其君
之行成卽楚人亦惟願其君之罷役穀梁傳謂
衆欲之是也其與及齊及鄭平異者何也邦交

之常理宜稱國對魯爲文。不出魯之君大夫而稱齊人鄭人則贅矣。其與鄭人來輸平異義何也。彼以將命之人言也。平者邦交也。若出將命者之名則與華孫來盟之文同而疑於其人之私矣。胡傳謂平者在下故貶稱人非也使欲見平者在下則如袁婁書宋華元及楚子反盟不更切著乎。

六月癸卯晉師滅赤狄潞氏以潞子嬰兒歸其稱師將非卿也

秦人伐晉

王札子殺召伯毛伯

兩下相殺不志於春秋以凡國亂衆人擅殺與
臣下自相殺經皆稱人惟王札子殺召伯毛伯
陳侯之弟招殺陳世子偃師楚公子棄疾殺公
子比皆直書其人蓋義繫於其人而不可以漫
稱人使書周人殺召伯毛伯不惟斥言周人非
屬辭之體而王室無政使寵子擅殺大臣之迹
不可得而見矣書陳人殺其世子偃師則陳侯

付託非人。招以親屬。忍爲大惡。不可得而見矣。
書楚人殺公子比。則疑於討賊而亂賊相傾之。
迹不可得而見矣。札以名而加子上。非義所安。
也。豈文與叔近而誤與。

秋螽

仲孫蔑會齊高固于無婁

初稅畝

穀梁傳初者始也。古者十一藉而不稅。初稅畝。
非正也。古者三百步爲里。名曰井田。井田者九

百畝公田居其一私田稼不善則非吏公田稼不善則非民。初稅畝者非公之去公田而履畝十取一也以公之與民爲已悉矣。古者公田爲居井竈葱韭盡取焉。汪氏克寬曰公田之法十取其一。今又履其餘畝十復収其一。穀梁傳所謂去公田而履畝十取其一蓋除去公田之入而復取十一也。先儒皆謂因公田稼不善故履私畝而稅之。不知同井之田稼之善否所爭無幾。旣變法以苛取豈肯復仍十一之舊乎。

冬蝻生

胡傳始生日蝻旣大曰蝻

饑

黃氏仲炎曰莊公二十八年大無麥禾而不言饑蓋當時雖無素備然猶知告糴於齊故民猶未至於流亡也今宣公再書饑是旣無蓄積之備又無救荒之策坐視其民之饑而死爾

十有六年春王正月晉人滅赤狄甲氏及留吁其稱人將卑師少也。薛氏季宣曰攢函之會

未幾而三滅狄大無信也

夏成周宣榭火

左傳人火之也凡火人火曰火天火曰災公羊傳成周者東周也宣榭者宣宮之榭也胡傳按呂大臨考古圖有邦敦者稱王格於宣榭呼內史策命邦是知宣榭者宣王之廟也榭者射堂之制其堂無室以便射事宣王之廟謂之榭者其廟制如榭也汪氏曰疑宣王南征北伐講武於此遂以爲廟按諸說皆因胡傳以爲廟而誤

胡傳則以公羊傳稱宣宮而誤宣王會諸侯於東都故有講武之榭而至是火何故必以爲廟乎宣王時周猶未東使書周宣榭火則無以別舊都與新邑故地之

秋鄭伯姬來歸

伯姬書大歸而歸不見經以是知內女之嫁不書者也

冬大有年

承屢祲之後故國人以有年爲喜而舊史志之

也

十有七年春王正月庚子許男錫我卒

丁未蔡侯申卒

夏葬許昭公

葬蔡文公

六月癸卯日有食之

己未公會晉侯衛侯曹伯邾子同盟于斷道

宣公終世諂事齊乃忽與晉盟而謀伐焉蓋行

父怒齊則公不得自主矣。

秋公至自會

冬十有一月壬午公弟叔勝卒

公子公叔公兄弟之不爲大夫者皆不卒。而勝書卒。何也。公爲之變而加禮。故特著於冊書也。勝終身不食宣公之食。而其子世爲魯卿。則公。有怍焉。而於其卒加禮。可知矣。叔氏也。勝名也。何以知其非大夫也。以稱弟知之也。使爲大夫。則當書公子勝卒。而不稱弟矣。

十有八年春晉侯衛世子臧伐齊

晉衛之卿皆以私忿強其君世子以出蓋政在大夫君拱手以聽不獨魯爲然。

公伐杞

夏四月

秋七月邾人戕鄆子于鄆

左傳凡自虐其君曰弑自外曰戕。汪氏克寬謂邾子貶而稱人胡傳謂鄆之臣子不能救君難使邾人得造其國都而戕殺之非也蓋陰使人賊之耳上無侵伐圍入之文則非君行卿將

可知矣。其不曰盜何也。稱盜則不知其爲邾人也。左傳闔戕戴吳亦倉卒賊殺之謂

甲戌楚子旅卒

公羊傳何以不書葬吳楚之君不書葬避其號也。楚子卒始見經先儒以爲進之非也。旅在楚爲勤政之賢君。在春秋則爲犯上作亂之大盜。旅以前雖僭王其國未敢有陰窺周室之謀也。雖間有侵伐未嘗有力征中夏之志也。至旅而隱然有鞭笞天下之心。尚賴齊晉大國參錯相

制其力與勢猶不足以移周鼎使皆如陳蔡鄭
許可懾威而服則其禍更有不可言者矣春秋
何故乃進之乎蓋至是舊史始有其文耳若以
進之爲義則篡弑之君其卒皆志於經而天王
之崩葬有不見者矣秦康公之卒志非賢於穆
公也至康始與魯通也楚頹十八年以前猶以
號舉則自頹以前卒不赴魯可知頹之弑商臣
當國必無赴告而舊史具載其事者人倫極變
以傳聞而志也商臣之死或赴不及魯或舊史

惡之而不書其卒。皆未可知。至旅則北挫晉兵。
執霸權以臨東夏。諸侯服屬。故赴告及魯。而舊
史書之耳。春秋於楚事之詳。與天王崩葬之闕。
一仍舊史。而蠻荆之盛。諸夏之衰。天子之微。諸
侯之悖。皆見矣。

公孫歸父如晉

冬十月壬戌公薨于路寢

歸父還自晉至笙遂奔齊

左傳冬公薨季文子言於朝曰使我殺適立庶

以失大援者仲也。夫遂逐東門氏子家。還及笙
壇。帷復命於介。旣復命。袒括髮。卽位哭。三踊而
出。遂奔齊。書曰：還自晉。善之也。歸父欲倚晉
以去三桓。季氏之誣辭也。蓋季氏世執魯政而
宣公之親仲遂過於季孫。爲行父所忌久矣。故
乘公之薨。歸父之出而逐焉。使歸父交親於晉。
則當奔晉而不奔齊矣。考之於經。行父三聘晉
而仲遂之生未嘗一至焉。歸父初聘。安敢不量
而入。遽及國之變事乎。其奔齊正以行父與齊。

新憾可以隱身焉爾